

სახელმწიფო შესყიდვის შესახებ

ხელშეკრულება N

წინამდებარე დოკუმენტი წარმოადგენს სახელმწიფო შესყიდვის შესახებ ხელშეკრულების პროექტს, რომელიც დაიდება ელექტრონული ტენდერის ჩატარების შედეგად. წინამდებარე ხელშეკრულების პროექტის პირობების დაზუსტება განხორციელდება ხელშეკრულების გაფორმების დროს
ქ. ბათუმი ----- 2021 წელი

ერთის მხრივ, აჭარის ავტონომიური რესპუბლიკის სოფლის მეურნეობის სამინისტრო (შემდგომში „შემსყიდველი“), წარმოდგენილი ----- სახით და მეორეს მხრივ, ----- (შემდგომში „მიმწოდებელი“), წარმოდგენილი მისი ----- სახით, „სახელმწიფო შესყიდვების შესახებ“ საქართველოს კანონის მე-3 მუხლის პირველი პუნქტის „ჟ“ ქვეპუნქტის და მიმწოდებლის (მისი დასახელება) სატენდერო წინადადების საფუძველზე, ელექტრონული ტენდერის საშუალებით აუქციონის გარეშე (NAT-----) მეთოდით ჩატარების შედეგად დებენ წინამდებარე ხელშეკრულებას შემდეგზე:

1. ხელშეკრულებაში გამოყენებულ ტერმინთა განმარტებები

- 1.1. „ხელშეკრულება სახელმწიფო შესყიდვის შესახებ“ (შემდგომში - „ხელშეკრულება“) შემსყიდველსა და მიმწოდებელს შორის დადებული წინამდებარე ხელშეკრულება, რომელიც დამოწმებულია კვალიფიციური ელექტრონული ხელმოწერით/კვალიფიციური ელექტრონული შტამპით მხარეთა მიერ, მასზე თანდართული ყველა დოკუმენტით.
- 1.2. „ხელშეკრულების ღირებულება“ - საერთო თანხა, რომელიც უნდა გადაიხადოს შემსყიდველმა მიმწოდებლის მიერ ხელშეკრულებით ნაკისრი ვალდებულებების სრული და ზედმიწევნით შესრულებისათვის.
- 1.3. „დღე“, „კვირა“, „თვე“ - კალენდარული დღე, კვირა, თვე. თუ ხელშეკრულებით გათვალისწინებული ვადის უკანასკნელი დღე ემთხვევა უქმე ან დასვენების დღეს, ვადის დამთავრების დღედ ჩაითვლება მისი მომდევნო პირველი სამუშაო დღე.
- 1.4. „შემსყიდველი“ - ორგანიზაცია, რომელიც ახორციელებს შესყიდვას.
- 1.5. „მიმწოდებელი“ - პირი, რომელიც ახორციელებს სამუშაოების შესრულებას ხელშეკრულების ფარგლებში.
- 1.6. „სამშენებლო სამუშაო“ - ხელშეკრულების მე-2 მუხლით გათვალისწინებული ხელშეკრულების საგანი.
- 1.7. „ხარჯთაღრიცხვა“ - მიმწოდებლის მიერ ელექტრონული ტენდერის ფარგლებში წარმოდგენილი „ხარჯთაღრიცხვა“.
- 1.8. „გეგმა-გრაფიკი“ - მიმწოდებლის მიერ ხელშეკრულების გაფორმების შემდგომ წარმოდგენილი „გეგმა-გრაფიკი“.

2. ხელშეკრულების საგანი

- 2.1. ხელშეკრულების საგანია - სამინისტროს 2021 წლის პროგრამის "სამელიორაციო სისტემების რეკონსტრუქცია" ფარგლებში ქედის მუნიციპალიტეტის სოფელ ზვარეს (ს.კ. 21.00.549) სარწყავი არხის სარეკონსტრუქციო სამუშაოების (შემდგომში - „სამუშაო“), (CPV კოდი 45200000, 45247000) ელექტრონული ტენდერის საშუალებით აუქციონის გარეშე მეთოდით შესყიდვა.
- 2.2. მიმწოდებელი ვალდებულია სამუშაოები განახორციელოს წინამდებარე ხელშეკრულებითა და საპროექტო-სახარჯთაღრიცხვო დოკუმენტაციით განსაზღვრული პირობების შესაბამისად.
- 2.3. დაფინანსების წყარო - 2021 წლის აჭარის ავტონომიური რესპუბლიკის რესპუბლიკური ბიუჯეტი.

3. ხელშეკრულების ღირებულება

- 3.1. ხელშეკრულების ჯამური ღირებულება შეადგენს ----- (-----) ლარს.
- 3.2. ხელშეკრულების ჯამური ღირებულება მოიცავს ხელშეკრულებით გათვალისწინებულ სამუშაოების განხორციელებასთან დაკავშირებულ მიმწოდებლის ყველა ხარჯს და საქართველოს კანონმდებლობით გათვალისწინებულ ყველა გადასახადს.

4. ანგარიშსწორების წესი

4.1. ანგარიშსწორება განხორციელდება უნაღდო ანგარიშსწორების ფორმით. ანგარიშსწორება განხორციელდება ხელშეკრულებაში მითითებულ მიმწოდებლის საბანკო ანგარიშზე.

4.2. ანგარიშსწორება განხორციელდება ლარში.

4.3. ეტაპობრივი/საბოლოო ანგარიშსწორება განხორციელდება გეგმა-გრაფიკით გათვალისწინებული შესრულებულ სამუშაოებზე ტექნიკური ზედამხედველობის განმახორციელებელი პირ(ებ)ის მიერ დამოწმებული შესრულებული სამუშაოების აქტი - ფორმა #2, ანგარიშფაქტურის, შესრულებული სამუშაოების მოცულობის ხარისხის და ელექტრონული ტენდერის ეტაპზე სატენდერო წინადადებით წარმოდგენილი საპროექტო-სახარჯთაღრიცხვო დოკუმენტაციასთან შესაბამისობაზე ექსპერტიზის დადებითი დასკვნის, რომელიც გაცემული უნდა იყოს სსიპ - „ლევან სამხარაულის სახელობის სასამართლო ექსპერტიზის ეროვნული ბიუროს“ ან სხვა უფლებამოსილი/აკრედიტირებული პირის მიერ (იმ შემთხვევაში, თუ დასკვნის გამცემი ორგანო არ იქნება სსიპ - „ლევან სამხარაულის სახელობის სასამართლო ექსპერტიზის ეროვნული ბიურო“, მიმწოდებელმა დამატებით უნდა წარმოადგინოს დასკვნის გამცემი პირის უფლებამოსილების/აკრედიტაციის დამადასტურებელი დოკუმენტის ასლი (უფლებამოსილების/აკრედიტაციის სფერო უნდა ფარავდეს მოთხოვნილ მომსახურებას), შემსყიდველსა (მინისტრის ბრძანებით განსაზღვრული ხელშეკრულების შესრულების კონტროლის განმახორციელებელი ჯგუფი) და მიმწოდებელს შორის შესრულებულ სამუშაოებზე გაფორმებული შესაბამისი მიღება-ჩაბარების აქტისა და ანაზღაურების სერთიფიკატი - ფორმა #3 -ის გაფორმებიდან არაუგვიანეს 10 (ათი) სამუშაო დღის ვადაში.

4.4. ხარჯთაღრიცხვით განსაზღვრული გაუთვალისწინებელი სამუშაოებისათვის გათვალისწინებული თანხა გამოიყენება მხოლოდ სამუშაოს შესრულების პროცესში დამატებით ჩასატარებელი სამუშაოების შესასრულებლად, შესაბამისი მოტივირებული მომართვის საფუძველზე, შემსყიდველთან წერილობით შეთანხმებით.

4.5. შემსყიდველი უფლებამოსილია, ხელშეკრულებით გათვალისწინებული პირობების დარღვევის გამო დაკისრებული ჯარიმა ან/და პირგასამტეხლო (ასეთის არსებობის შემთხვევაში) დაუკავოს (გამოუქვითოს) მიმწოდებელს ასანაზღაურებელი თანხიდან და გადარიცხოს ბიუჯეტის შესაბამის ანგარიშზე.

5. შესრულებული სამუშაოს შესაბამისობა

5.1. ხელშეკრულების მე-2 პუნქტით გათვალისწინებული სარეკონსტრუქციო სამუშაოები უნდა შესრულდეს ჯეროვნად საპროექტო დოკუმენტაციის, ტექნიკური პირობების, ასევე საქართველოში მოქმედი ყველა საჭირო სამშენებლო ნორმების, სტანდარტებისა და წესების მოთხოვნების დაცვით და წინამდებარე ხელშეკრულების პირობების შესაბამისად.

5.2. წინამდებარე ხელშეკრულების 5.1. ქვეპუნქტში აღნიშნული ნორმების, სტანდარტებისა და წესებიდან ნებისმიერი გადახვევის შემთხვევაში შემსყიდველი უფლებამოსილია არ მიიღოს სამუშაო ან/და მიმწოდებლის მიმართ გამოიყენოს ამ ხელშეკრულებითა და საქართველოს კანონმდებლობით გათვალისწინებული პასუხისმგებლობის ზომები.

5.3. სარეკონსტრუქციო სამუშაოების პროცესში გამოყენებული ყველა მასალა-მოწყობილობა უნდა იყოს მაღალი ხარისხის, რაზედაც ტექნიკური ზედამხედველობის განმახორციელებელ პირ(ებ)ი ვალდებულია მოითხოვოს საპროექტო-სახარჯთაღრიცხვო დოკუმენტაციაში მითითებული მასალების მახასიათებლების შესაბამისობის დამადასტურებელი დოკუმენტ(ებ)ი (სერტიფიკატ(ებ)ი), რაზედაც ტექნიკური ზედამხედველობის განმახორციელებელ პირ(ებ)ს უფლება აქვს სარეკონსტრუქციო სამუშაოების ნებისმიერ ეტაპზე შეამოწმოს გამოყენებული მასალებისა და შესრულებულ სამუშაოთა შესრულების ხარისხი. იმ შემთხვევაში, თუ ხარისხი არ აღმოჩნდება სამშენებლო ნორმებისა და სტანდარტების შესაბამისი, შემსყიდველი, ტექნიკური ზედამხედველობის განმახორციელებელ პირ(ებ)ის წერილობითი მიმართვის საფუძველზე, უფლებამოსილია შეაჩეროს სამუშაოების წარმოება და აკრძალოს შეუსაბამო მასალების გამოყენება. ტექნიკური ზედამხედველობის განმახორციელებელ პირ(ებ)ის მიერ მასალის დაწუნების შემთხვევაში წუნდებული მასალის გამოყენება სარეკონსტრუქციო სამუშაოებისთვის

დაუშვებელია. იმ შემთხვევაში, თუ მიმწოდებლის მიერ შესრულებული სარეკონსტრუქციო სამუშაოები არ იქნება წინამდებარე ხელშეკრულების პირობებთან შესაბამისობაში, მიმწოდებელი ვალდებულია გამოასწოროს სამუშაოს შესრულების მომენტში დაშვებული ხარვეზები (მ.შ. შეცვალოს გამოყენებული მასალა) საკუთარი ხარჯებით.

5.4. სახელშეკრულებო ობიექტზე მიმწოდებელმა უნდა აწარმოოს სამუშაოთა წარმოების ჟურნალი, სადაც ყოველდღიურად უნდა ჩაიწეროს დღიური შესრულებული სამუშაოების მოცულობა, შემსრულებელი პერსონალის მონაცემები, ხარისხის დაცვის პროცედურები და სხვა. ასევე, აღნიშნულ ჟურნალში ტექნიკური ზედამხედველობის განმახორციელებელი პირ(ებ)ი აფიქსირებს თავის შენიშვნებსა და რეკომენდაციებს სარეკონსტრუქციო სამუშაოების წარმოების შესახებ. ამასთან, ჟურნალში ჩაიწერება განსაკუთრებული დავალებები, აღმოჩენილი დეფექტები და მათი აღმოფხვრის ვადები. მიმწოდებელმა უნდა აწარმოოს ყველა სამშენსრულებლო ტექნიკური დოკუმენტაცია, რომელიც განსაზღვრულია მოქმედი სამშენსრულო ნორმებით და სტანდარტებით ობიექტის მოვლა-შენახვის სპეციფიკის გათვალისწინებით.

5.5. ფარული სამუშაოების წარმოების შემთხვევაში მიმწოდებელი ვალდებულია შეადგინოს ფარული სამუშაოების დამადასტურებელი წერილობითი აქტები. ფარული სამუშაოები წარმოებული უნდა იქნას ტექნიკური ზედამხედველობის განმახორციელებელ პირ(ებ)თან ერთად, აქტი დამოწმებული უნდა იყოს, როგორც მიმწოდებლის, ასევე ტექნიკური ზედამხედველობაზე პასუხისმგებელი პირ(ებ)ის მიერ.

6. სამუშაოს შესრულების ვადები და მიღება-ჩაბარების წესი

6.1. შესრულებული სამუშაოს შესაბამისი ეტაპის მიღება-ჩაბარება ხორციელდება ამ ხელშეკრულების 2.1. ქვეპუნქტში აღნიშნულ ადგილზე, შესაბამისი მიღება-ჩაბარების აქტის გაფორმებით.

6.2. მიმწოდებელი ვალდებულია სამუშაოები დაიწყოს შემსყიდველის წერილობითი შეტყობინებიდან (შეტყობინება გაეგზავნება თოვლის ნალექის გამრობის გათვალისწინებით) არაუმეტეს 5 (ხუთი) კალენდარული დღის განმავლობაში. მიმწოდებელი ვალდებულია სამუშაოს დაწყების დღის შესახებ წერილობით აცნობოს შემსყიდველს. ასევე მიმწოდებელი ვალდებულია სამუშაოების დაწყების დღისათვის უზრუნველყოს სამელიორაციო არხის სარეკონსტრუქციო მონაკვეთებზე (ნატურაში) პიკეტების აღმნიშვნელი სამიჯნე ნიშნების და საინფორმაციო დაფის განთავსება (იხ. ხელშეკრულების 9.1.15 პუნქტი). სამუშაოს შესრულების ვადაა 60 (სამოცი) კალენდარული დღე სამუშაოს დაწყებიდან.

6.3. მიმწოდებელმა ხელშეკრულების გაფორმებიდან არაუგვიანეს 5 კალენდარული დღის ვადაში, შემსყიდველთან შესათანხმებლად უნდა წარმოადგინოს შესასრულებელი სამუშაოების ეტაპობრივი შესრულების გეგმა-გრაფიკი დანართი № 3-ის მიხედვით, რომელიც გახდება ხელშეკრულების განუყოფელი ნაწილი; მიმწოდებელი იღებს ვალდებულებას სამუშაოები შეასრულოს ეტაპობრივად, მის მიერ წარმოდგენილი შესასრულებელი სამუშაოების გეგმა-გრაფიკის მიხედვით (დანართი N3). შენიშვნა: „ეტაპი“- იგულისხმება მიმწოდებლის მიერ ტენდერის ეტაპზე წარმოდგენილი შესასრულებელი სამუშაოების ხარჯთაღრიცხვის (დანართი № 1) შესაბამისად სარეკონსტრუქციო სამელიორაციო არხის ცალკეული მონაკვეთ(ებ)ის (პიკეტ(ებ)ი) დასრულებული სახით ჩაბარება შემსყიდველისათვის, სადაც მითითებული უნდა იყოს კონკრეტულ ეტაპზე შესასრულებელი სამუშაოების ჯამური ღირებულება (გაუთვალისწინებელი ხარჯების შემთხვევაში გეგმა-გრაფიკის შედგენის დროს ხარჯთაღრიცხვაში დაფიქსირებული გაუთვალისწინებელი ხარჯების შესაბამისი თანხა დღგ-ს ჩათვლით გამოირიცხება საერთო ღირებულებიდან). შემსყიდველისთვის წარდგენილი გეგმა-გრაფიკით განსაზღვრული ვადები არ უნდა აღემატებოდეს ხელშეკრულებით განსაზღვრულ სამუშაოს შესრულების ვადას (60 (სამოცი) კალენდარული დღე). შესრულებული სამუშაოების მიღება-ჩაბარება განხორციელდება წარმოდგენილი ეტაპობრივი შესრულების გეგმა-გრაფიკის მიხედვით.

6.4. გეგმა-გრაფიკით გათვალისწინებული შესრულებული სარეკონსტრუქციო სამუშაოების მიღება-ჩაბარებისათვის შემსყიდველს უნდა წარედგინოს ტექნიკური ზედამხედველობის განმახორციელებელი პირ(ებ)ის მიერ დამოწმებული შესრულებული სამუშაოების აქტი - ფორმა # 2, სამუშაოების წარმოების ჟურნალი დამოწმებული ტექნიკური ზედამხედველობის განმახორციელებელი პირ(ებ)ის მიერ, ფარული

სამუშაოების აქტები (ასეთის არსებობის შემთხვევაში) დამოწმებული ტექნიკური ზედამხედველობის განმახორციელებელი პირ(ებ)ის მიერ, 2 მ³-ზე მეტი ბეტონის სამუშაოების შემთხვევაში ლაბორატორიული გამოცდის დასკვნა, გამოყენებული მასალების შესაბამისობის სერტიფიკატი, ანგარიშფაქტურა, შესრულებული სამუშაოების მოცულობის ხარისხის და ელექტრონული ტენდერის ეტაპზე სატენდერო წინადადებით წარმოდგენილი საპროექტო-სახარჯთაღრიცხვო დოკუმენტაციასთან შესაბამისობაზე ექსპერტიზის დადებითი დასკვნა, რომელიც გაცემული უნდა იყოს სსიპ - „ლევან სამხარაულის სახელობის სასამართლო ექსპერტიზის ეროვნული ბიუროს“ ან სხვა უფლებამოსილი/აკრედიტირებული პირის მიერ (იმ შემთხვევაში, თუ დასკვნის გამცემი ორგანო არ იქნება სსიპ - „ლევან სამხარაულის სახელობის სასამართლო ექსპერტიზის ეროვნული ბიურო“, მიმწოდებელმა დამატებით უნდა წარმოადგინოს დასკვნის გამცემი პირის უფლებამოსილების/აკრედიტაციის დამადასტურებელი დოკუმენტის ასლი (უფლებამოსილების/აკრედიტაციის სფერო უნდა ფარავდეს მოთხოვნილ მომსახურებას). აღნიშნული დოკუმენტაციის წარმოდგენის შემდეგ შემსყიდველსა (მინისტრის ბრძანებით განსაზღვრული ხელშეკრულების შესრულების კონტროლის განმახორციელებელი ჯგუფი) და მიმწოდებელს შორის შესრულებულ სამუშაოებზე დგება შესაბამისი მიღება-ჩაბარების აქტი და ანაზღაურების სერტიფიკატი - ფორმა #3.

6.5. გამოყენებული მასალები შესაბამისობაში უნდა იყოს საპროექტო-სახარჯთაღრიცხვო დოკუმენტაციით განსაზღვრულ მოთხოვნებთან.

6.6. მიმწოდებელმა უნდა წარმოადგინოს დას-რუ-ლე-ბულ სამუშაოთა მისაღებად სავალდებულო დოკუმენტაცია ----- სამინისტროს 202- წლის ----- N-- ბრძანების შესაბამისად.

6.7. ტექნიკური ზედამხედველობის განმახორციელებელ პირ(ებ)ი ვალდებულია ოპერატიულად, წერილობითი სახით აცნობოს მიმწოდებელს სამუშაოთა მიმდინარეობის პროცესში შემოწმების შედეგად გამოვლენილი წუნდებული სამუშაოს მოცულობის, წუნდების მიზეზების და წუნდების გამოსწორების ვადების შესახებ.

6.8. სამუშაოს შემოწმების შედეგად გამოვლენილი დეფექტის ან ნაკლის აღმოფხვრას საკუთარი ხარჯებით უზრუნველყოფს მიმწოდებელი.

6.9. შემსყიდველის მხრიდან სამუშაოების მიღება-ჩაბარებას განახორციელებს მინისტრის ბრძანებით განსაზღვრული ხელშეკრულების შესრულების კონტროლის განმახორციელებელი ჯგუფი.

7. გარანტია

7.1. მიმწოდებელი იძლევა გარანტიას, რომ სამუშაო განხორციელდება საქართველოში მოქმედი ყველა საჭირო სამშენებლო ნორმების, სტანდარტებისა და წესების შესაბამისად.

7.2. ხელშეკრულებით გათვალისწინებული სარჩავი არხზე განხორციელებული სარეკონსტრუქციო სამუშაოების საგარანტიო ვადა შეადგენს 3 (სამ) წელს.

7.3. საგარანტიო ვადის ათვლა იწყება საბოლოო მიღება-ჩაბარების აქტის შედგენიდან.

7.4. მიმწოდებელი პასუხს აგებს საგარანტიო ვადის განმავლობაში ობიექტის შეუფერებელ ფუნქციონირებაზე. თუ საგარანტიო ვადის განმავლობაში აღმოჩნდება ხარვეზი ან ნაკლი, მიმწოდებელი იღებს ვალდებულებას საკუთარი ხარჯით აღმოფხვრას ნებისმიერი ხარვეზი და ნაკლი შემსყიდველის წერილობითი შეტყობინებიდან 30 (ოცდაათი) კალენდარული დღის ვადაში.

7.5. თუ მიმწოდებელი საგარანტიო ვადის განმავლობაში საკუთარი ხარჯებით ვერ უზრუნველყოფს ექსპლუატაციის პროცესში წარმოქმნილი ხარვეზების აღმოფხვრას, შემსყიდველი უფლებამოსილია იმოქმედოს მოქმედი კანონმდებლობის შესაბამისად.

8. ხელშეკრულების შესრულების კონტროლი

8.1. შემსყიდველს უფლება აქვს ხელშეკრულების შესრულების ნებისმიერ ეტაპზე განახორციელოს კონტროლი.

8.2. მიმწოდებელი ვალდებულია საკუთარი რესურსებით უზრუნველყოს შემსყიდველი კონტროლის ჩატარებისათვის აუცილებელი ტექნიკური საშუალებებით და სხვა სამუშაო პირობებით.

8.3. ყველა გამოვლენილი ხარვეზის ან ნაკლის აღმოფხვრასთან დაკავშირებული ხარჯების ანაზღაურება ეკისრება მიმწოდებელს საქართველოს კანონმდებლობით დადგენილი წესით.

8.4. მიმწოდებლის მიერ ხელშეკრულებით ნაკისრი ვალდებულებების შესრულების კონტროლს შემსყიდველის მხრიდან განახორციელებს მინისტრის ბრძანებით შექმნილი შესაბამისი კონტროლის განმახორციელებელი ჯგუფი.

9. მხარეთა უფლება-მოვალეობანი

9.1. მიმწოდებელი ვალდებულია:

9.1.1. დროულად და კეთილსინდისიერად შეასრულოს ხელშეკრულებით ნაკისრი ვალდებულებები;

9.1.2. წერილობით წარმოადგინოს სამინისტროში სამუშაოს შესრულების დამადასტურებელი დოკუმენტაცია ხელშეკრულების მე-6 პუნქტის შესაბამისად;

9.1.3. სამშენებლო ნორმების, სტანდარტებისა და წესების სრული დაცვით უზრუნველყოს სამუშაოთა მაღალი ხარისხით შესრულება და მათი დამთავრება ხელშეკრულებით განსაზღვრულ ვადებში;

9.1.4. სამუშაოები აწარმოოს ტექნიკური ზედამხედველობის განმახორციელებელი პირ(ებ)ის უშუალო ზედამხედველობის ქვეშ. მიმწოდებელი ვალდებულია წინასწარ წერილობით აცნობოს შემსყიდველს სამუშაოების დაწყების შესახებ. შემსყიდველს ასევე, წერილობით უნდა ეცნობოს სამუშაოების დასრულების შესახებ, არაუგვიანეს გეგმა-გრაფიკით და ხელშეკრულებით გათვალისწინებული სამუშაოების შესრულების ვადაში. სამუშაოების დასრულების შესახებ შეტყობინებას თან უნდა ახლდეს 6.4. ქვეპუნქტით გათვალისწინებული შესაბამისი დოკუმენტაცია;

9.1.5. აწარმოოს სამუშაოების ჟურნალი და ფარული სამუშაოების აქტები;

9.1.6. სამუშაოების შესრულების პროცესში შეტყობინების მიღებისთანავე აღმოფხვრას უხარისხოდ შესრულებული სამუშაო შემსყიდველის მხრიდან რაიმე დამატებითი დანახარჯების გაწევის გარეშე;

9.1.7. მიმწოდებელი პასუხისმგებელი უნდა იყოს სამუშაოს შესასრულებლად გამოყენებული მასალების, აღჭურვილობის და მანქანა-მექანიზმების უსაფრთხოებაზე. ხსენებული მასალების, აღჭურვილობის და მანქანა-მექანიზმების დაკარგვის ან გაუმართაობის შედეგად გამოწვეული რისკი ეკისრება მიმწოდებელს;

9.1.8. მიმწოდებელმა სამუშაოების განხორციელების განმავლობაში მათ მიღებამდე საქართველოში მოქმედი კანონმდებლობის და არსებული ნორმების შესაბამისად, უნდა მიიღოს აუცილებელი ზომები ტექნიკური უსაფრთხოების და გარემოს დაცვის უზრუნველსაყოფად;

9.1.9. მიმწოდებელი ვალდებულია მიიღოს უსაფრთხოების აუცილებელი ზომები მშენებლობის ზონაში ხანძრის გაჩენის და აფეთქების თავიდან ასაცილებლად;

9.1.10. ნებისმიერ დროს, წინასწარი შეტყობინების გარეშე დაუშვას შემსყიდველი და მისი წარმომადგენლები სამუშაო ობიექტზე. საკუთარი ხარჯებით უზრუნველყოს გამოვლენილი ყველა ხარვეზის, დეფექტის ან ნაკლის აღმოფხვრა;

9.1.11. შემსყიდველს უმოკლეს ვადაში აცნობოს მისი ორგანიზაციის მოსალოდნელი რეორგანიზაციის ან ლიკვიდაციის შესახებ;

9.1.12. მიმწოდებელი პასუხისმგებელია სამუშაოს შესრულების პროცესში ისეთი სამშენებლო მასალების გამოყენებაზე, რომელთა მოპოვებაზეც კანონმდებლობით განსაზღვრულია სათანადო ლიცენზიის არსებობა;

9.1.13. სამუშაოების წარმოების პროცესში მიწისქვეშა კომუნიკაციების დაზიანების შემთხვევაში სრული პასუხისმგებლობა და დაზიანებით გამოწვეული ზარალის ანაზღაურება ეკისრება მიმწოდებელს;

9.1.14. ხელშეკრულებით გათვალისწინებული სამუშაოთა შესრულებისას იხელმძღვანელოს საპროექტო დოკუმენტაციის, ტექნიკური პირობების, სპეციფიკაციების, წინამდებარე ხელშეკრულების პირობებისა და საქართველოში მოქმედი ყველა საჭირო სამშენებლო ნორმების, სტანდარტებისა და წესების მოთხოვნების მიხედვით;

9.1.15. მიმწოდებელი ვალდებულია სამუშაოების დაწყების დღისათვის უზრუნველყოს სამელიორაციო არხის სარეკონსტრუქციო მონაკვეთებზე (ნატურაში) პიკეტების აღმნიშვნელი სამიჯნე

ნიშნების განთავსება. ასევე მიმწოდებელმა თვალსაჩინო ადგილას უნდა განათავსოს მინიმუმ 2 ცალი საინფორმაციო დაფა (100სმ/80სმ), ელექტრონულ ტენდერში არსებული ესკიზის შესაბამისად.

9.1.16. მიმწოდებელი ვალდებულია ხელშეკრულების გაფორმებიდან არაუგვიანეს 5 კალენდარული დღის ვადაში, შემსყიდველთან შესათანხმებლად წარმოადგინოს შესასრულებელი სამუშაოების ეტაპობრივი შესრულების გეგმა-გრაფიკი დანართი № 3-ის მიხედვით, რომელიც გახდება ხელშეკრულების განუყოფელი ნაწილი;

9.2. მიმწოდებელს უფლება აქვს:

9.2.1. მოსთხოვოს შემსყიდველს ხელშეკრულებით გათვალისწინებული პირობების შესაბამისად შესრულებული სამუშაოების ღირებულების ანაზღაურება.

9.3. შემსყიდველი ვალდებულია:

9.3.1 აწარმოოს ზედამხედველობა სამუშაოს მიმდინარეობაზე საამისოდ განსაზღვრული ტექნიკური ზედამხედველობის განმახორციელებელი პირ(ებ)ის საშუალებით, თანახმად მოქმედი სამშენებლო ნორმების, სტანდარტებისა და წესებისა, რომელთა დარღვევის შემთხვევაში იგი უფლებამოსილია შეაჩეროს სამუშაოები;

9.3.2. შეუფერხებლად აუნაზღაუროს მიმწოდებელს შესრულებული სამუშაოს ღირებულება ამ ხელშეკრულებით გათვალისწინებული ვადების შესაბამისად.

9.3.3. წერილობითი ფორმით დაუყოვნებლივ აცნობოს მიმწოდებელს რაიმე დეფექტის ან ნაკლის აღმოჩენის შესახებ.

9.4. შემსყიდველს უფლება აქვს:

9.4.1. განახორციელოს კონტროლი და ზედამხედველობა მიმწოდებლის მიერ ხელშეკრულების პირობების დაცვაზე.

9.4.2. ხელი მოაწეროს სამუშაოების მიღება-ჩაბარების (შესრულების) აქტებს;

9.4.3. ხელშეკრულების პირობების შეუსრულებლობის შემთხვევაში მიმწოდებლისა და ხელშეკრულების კონტროლის განმახორციელებელი ჯგუფის მონაწილეობით ფორმდება შესაბამისი აქტი, სადაც დეტალურად იქნება აღწერილი ხელშეკრულების შეუსრულებლობის მიზეზები. თუ მიმწოდებელის წარმომადგენელი უარს აცხადებს აღნიშნული აქტის შედგენაში მონაწილეობაზე, ხსენებული ფიქსირდება ამავე აქტში და იგი იწვევს იმავე სამართლებრივ შედეგებს, რასაც გამოიწვევდა მიმწოდებლის წარმომადგენლის მონაწილეობით შედგენილი აქტი. სამუშაოების უხარისხოდ შესრულების შემთხვევაში მიმწოდებელი ვალდებულია თავისი სახსრებით უზრუნველყოს წუნის აღმოფხვრა დაუყოვნებლივ.

9.4.4. უხარისხოდ შესრულებული სამუშაოების დაფიქსირება ხდება ტექნიკური ზედამხედველობის განმახორციელებელ პირ(ებ)ის მიერ შედგენილ შესაბამისი აქტის საფუძველზე, რის შემდეგაც მიმწოდებელს არ უნაზღაურდება დეფექტებით შესრულებული სამუშაოთა ღირებულება.

9.4.5. იმ შემთხვევაში, თუ მიმწოდებლის მხრიდან შესრულებულ სამუშაოთა წარმოდგენილი მოცულობები, ექსპერტიზის მიერ გაცემული დასკვნით არ შეესაბამება რეალობას, შემსყიდველი არ უნაზღაურებს მას აღნიშნულ სამუშაოთა ღირებულებას.

9.5. ტექნიკური ზედამხედველობის განმახორციელებელი პირ(ებ)ი და შემსყიდველი (მინისტრის ბრძანებით განსაზღვრული ხელშეკრულების შესრულების კონტროლის განმახორციელებელი ჯგუფი) ვალდებული არიან მიმწოდებელთან ერთად აწარმოონ სამუშაოების შესრულებაზე ხელშეკრულებით გათვალისწინებული ვადების მიმდინარეობის კონტროლი.

10. ხელშეკრულების პირობების შეუსრულებლობა

10.1. თუ მიმწოდებლის მიერ დარღვეული იქნა სამუშაოთა გეგმა-გრაფიკით გათვალისწინებული სამშენებლო სამუშაოს მიწოდების ვადები, მაშინ მას ეკისრება:

10.1.1. პირგასამტეხლოს გადახდა შესაბამისი გეგმა-გრაფიკით გათვალისწინებული შესასრულებელი სამშენებლო სამუშაოს ღირებულების 0,02 %-ის ოდენობით ყოველ ვადაგადაცილებულ დღეზე;

10.1.2. იმ შემთხვევაში თუ გეგმა-გრაფიკით გათვალისწინებული შესასრულებელი სამუშაოს ვადა გადაცდება 15 კალენდარულ დღეს მიმწოდებელს ერთჯერადად ეკისრება პირგასამტეხლო შესაბამისი ეტაპით გათვალისწინებული შესასრულებელი ვალდებულების 2 %-ის ოდენობით და განიხილება ხელშეკრულების ცალმხრივად შეწყვეტის მიზანშეწონილობის საკითხი.

10.2. ხელშეკრულების 10.1. ქვეპუნქტებით გათვალისწინებული პირგასამტეხლოების გადახდა არ ათავისუფლებს მიმწოდებელს ძირითადი ვალდებულებების შესრულებისაგან.

10.3. ხელშეკრულების 10.1. ქვეპუნქტით გათვალისწინებული პირგასამტეხლოს გამოთვლისას არ გამოიანგარიშება 6.4 ქვეპუნქტით გათვალისწინებული დადებითი საექსპერტო დასკვნის წარმოდგენის პერიოდი. (მიმწოდებლის მიერ შემსყიდველისათვის ტექნიკური ზედამხედველობის განმახორციელებელი პირის მიერ დამოწმებული შესრულებული სამუშაოების აქტის - ფორმა # 2-ის წარმოდგენის მომენტიდან). წინამდებარე ქვეპუნქტით გათვალისწინებული პირობა არ ვრცელდება გეგმა-გრაფიკის (დანართი N3-ის) ბოლო ეტაპით განსაზღვრულ ვადაზე.

10.4. სახელმწიფო შესყიდვის შესახებ ხელშეკრულების პირობების მიმწოდებლის მიერ შეუსრულებლობის გამო, შემსყიდველის მიერ ხელშეკრულების ცალმხრივად შეწყვეტის შემთხვევაში, მიმწოდებელს ეკისრება პირგასამტეხლო ხელშეკრულების ღირებულების 5 (ხუთი) %-ის ოდენობით.

10.5. მიმწოდებელი ვალდებულია დარიცხული პირგასამტეხლოს თანხა პირგასამტეხლოს დარიცხვის შესახებ შეტყობინების მიღებიდან 7 (შვიდი) კალენდარული დღის ვადაში ჩარიცხოს შეტყობინებაში მითითებულ ბიუჯეტის შესაბამის ანგარიშზე და წარუდგინოს შემსყიდველს აღნიშნულის დამადასტურებელი დოკუმენტი (საგადახდო დავალების დედანი ან ბანკის მიერ დამოწმებული ასლი).

10.6. შემსყიდველის თანხმობის გარეშე ქვეკონტრაქტორის აყვანის შემთხვევაში, შემსყიდველი უფლებამოსილია მიმწოდებელს დააკისროს ჯარიმის სახით პირგასამტეხლო სახელშეკრულებო თანხის 1%-ის ოდენობით. შემსყიდველი უფლებამოსილია ასევე მიმწოდებელს ცალმხრივად შეუწყვიტოს ხელშეკრულება. წინამდებარე ქვეპუნქტით გათვალისწინებული პირობა გავრცელდება მთელი საგარანტიო პერიოდის განმავლობაში (სამუშაოს საბოლოო მიღება-ჩაბარებიდან 3 წელი).

10.7. ხელშეკრულების 7.4. ქვეპუნქტით გათვალისწინებული ვადის დარღვევის შემთხვევაში მიმწოდებელს დაეკისრება პირგასამტეხლო ხელშეკრულების ჯამური ღირებულების 0,2 %-ის ოდენობით ყოველ ვადაგადაცილებულ დღეზე.

10.8. შემსყიდველის ან ტექნიკური ზედამხედველობის განმახორციელებელი პირისათვის სარეკონსტრუქციო ობიექტზე სამუშაოების წარმოების ჟურნალის წარუდგენლობა ან/და ჟურნალის არასათანადოდ წარმოება გამოიწვევს ყოველ გამოვლენილ შემთხვევაზე ერთჯერად ჯარიმას, სახელშეკრულებო ღირებულების 0.2% -ის ოდენობით.

10.9. მიმწოდებლის მიერ ხელშეკრულების გაფორმებიდან 5 კალენდარული დღის განმავლობაში, შემსყიდველთან შესათანხმებლად გეგმა-გრაფიკის დაგვიანებით წარმოდგენა გამოიწვევს მიმწოდებლის დაჯარიმებას სახელშეკრულებო ღირებულების 0,02%-ის ოდენობით ყოველ ვადაგადაცილებულ დღეზე.

10.10. მიმწოდებლის მიერ სამუშაოების დაწყების დღისათვის სამელიორაციო არხის სარეკონსტრუქციო მონაკვეთებზე (ნატურაში) პიკეტების აღმნიშვნელი სამიჯნე ნიშნების და საინფორმაციო დაფის განთავსების ვალდებულების დაგვიანებით შესრულება გამოიწვევს მიმწოდებლის დაჯარიმებას სახელშეკრულებო ღირებულების 0,02%-ის ოდენობით ყოველ ვადაგადაცილებულ დღეზე.

10.11. ანგარიშსწორების ვადის გადაცილების შემთხვევაში, მიმწოდებელი უფლებამოსილია დააკისროს შემსყიდველს პირგასამტეხლო ყოველ ვადაგადაცილებულ დღეზე, დროულად გადაუხდელი თანხის 0.02% ოდენობით. ასეთი უფლებით მიმწოდებელმა შეიძლება ისარგებლოს მხოლოდ საკუთარი შეხედულებისამებრ და იგი არ წარმოადგენს მის ვალდებულებას.

11. ხელშეკრულებაში ცვლილების შეტანა და ხელშეკრულების შეწყვეტა

11.1. ხელშეკრულებაში ნებისმიერი ცვლილების, დამატების შეტანა შესაძლებელია მხოლოდ წერილობითი ფორმით, მხარეთა შეთანხმების საფუძველზე.

11.2. ხელშეკრულების პირობების, მათ შორის ფასის შეცვლა, დაუშვებელია, თუ ამ ცვლილებების შედეგად იზრდება ხელშეკრულების ჯამური ღირებულება ან უარესდება ხელშეკრულების პირობები შემსყიდველისთვის, გარდა საქართველოს სამოქალაქო კოდექსის 398-ე მუხლით გათვალისწინებული

შემთხვევებისა. ხელშეკრულების პირობების გადასინჯვა განხორციელდება საქართველოს კანონმდებლობით დადგენილი წესით.

11.3. ხელშეკრულების ერთ-ერთი მხარის მიერ ხელშეკრულების პირობების შეუსრულებლობის შემთხვევაში მეორე მხარე უფლებამოსილია ცალმხრივად მიიღოს გადაწყვეტილება ხელშეკრულების შეწყვეტის შესახებ.

11.4. ხელშეკრულება ასევე შეიძლება შეწყდეს მხარეთა ინიციატივით, ურთიერთშეთანხმების საფუძველზე.

11.5. იმ შემთხვევაში თუ ხელშეკრულებით გათვალისწინებული ვალდებულების დარღვევისათვის ხელშეკრულების 10.1.1. ქვეპუნქტის საფუძველზე მიმწოდებლისათვის დაკისრებული პირგასამტეხლოს ჯამური თანხა გადააქარბებს ხელშეკრულების ჯამური ღირებულების 0,5 %-ს, შემსყიდველს უფლება აქვს ცალმხრივად შეწყვიტოს ხელშეკრულება.

11.6. იმ შემთხვევაში თუ მიმწოდებლის მიერ არ იქნება შესრულებული 9.1.15 და 9.1.16 პუნქტებით ნაკისრი ვალდებულებები შემსყიდველს უფლება აქვს ცალმხრივად შეწყვიტოს ხელშეკრულება.

11.7. მიმწოდებელი ვალდებულია ხელშეკრულებით განსაზღვრულ რეკვიზიტებში ცვლილების განხორციელების შემთხვევაში აღნიშნულის შესახებ აცნობოს შემსყიდველს.

12. ხელშეკრულების შეწყვეტა მისი პირობების შეუსრულებლობის გამო

12.1. შემსყიდველს შეუძლია ვალდებულებების მთლიანი ან ნაწილობრივი შეუსრულებლობისთვის შეწყვიტოს ხელშეკრულება, მიმწოდებლისთვის ვალდებულებების შეუსრულებლობის შესახებ წერილობითი შეტყობინების შემდეგ:

ა) თუ მიმწოდებელს ხელშეკრულებით გათვალისწინებულ ან შემსყიდველის მიერ გაგრძელებულ ვადებში არ შეუძლია შეასრულოს ხელშეკრულებით გათვალისწინებული სამშენებლო სამუშაო;

ბ) თუ მიმწოდებელს არ შეუძლია შეასრულოს ხელშეკრულებით გათვალისწინებული, რომელიმე ვალდებულება.

12.2. შემსყიდველი უფლებამოსილია ხელშეკრულება ცალმხრივად შეწყვიტოს მიმწოდებლის მიერ 10.1.2. ქვეპუნქტით განსაზღვრული ვადის გასვლის შემდეგ (15 კალენდარული დღე), ამ შემთხვევაში მიმწოდებელს ეკისრება როგორც 10.1.2. ქვეპუნქტით გათვალისწინებული პირგასამტეხლო (ჯარიმა), ასევე წინამდებარე ხელშეკრულების 10.4. ქვეპუნქტით გათვალისწინებული პირგასამტეხლო.

12.3. ხელშეკრულების ცალკეული პირობების მოქმედების შეწყვეტა არ ათავისუფლებს მიმწოდებელს დანარჩენი ვალდებულებების შესრულებისაგან.

12.4. შემსყიდველს შეუძლია მიიღოს გადაწყვეტილება ხელშეკრულების შეწყვეტის შესახებ აგრეთვე:

ა) თუ შემსყიდველისათვის ცნობილი გახდა, რომ მისგან დამოუკიდებელი მიზეზის გამო იგი ვერ უზრუნველყოფს ხელშეკრულებით ნაკისრი ვალდებულებების შესრულებას;

ბ) თუ მისთვის ცნობილი გახდა, რომ მიმწოდებლის საკვალიფიკაციო მონაცემების დამადასტურებელი დოკუმენტები ყალბი აღმოჩნდა;

გ) საქართველოს კანონმდებლობით გათვალისწინებულ სხვა შემთხვევებში.

13. დაუძლეველი ძალა

13.1. ხელშეკრულების დამდები რომელიმე მხარის მიერ ხელშეკრულების პირობების შეუსრულებლობა არ გამოიწვევს საჯარიმო სანქციების გამოყენებას, თუ ხელშეკრულების შესრულების შეფერხება ან მისი ვალდებულებების შეუსრულებლობა არის დაუძლეველი ძალის გარემოების შედეგი.

13.2. ამ მუხლის მიზნებისათვის „დაუძლეველი ძალა“ ნიშნავს მხარეებისათვის გადაულახავ და მათი კონტროლისაგან დამოუკიდებელ გარემოებებს, რომლებიც არ არიან დაკავშირებული შემსყიდველისა და/ან მიმწოდებლის შეცდომებსა და დაუდევრობასთან და რომლებსაც გააჩნია წინასწარ გაუთვალისწინებელი ხასიათი. ასეთი გარემოება შეიძლება გამოწვეული იქნეს ომით ან სტიქიური მოვლენებით, ეპიდემიით, კარანტინით და საქონლის მიწოდებაზე ემბარგოს დაწესებით, საბიუჯეტო ასიგნებების მკვეთრი შემცირებით და სხვა.

13.3. დაუძლეველი ძალის დადგომის შემთხვევაში ხელშეკრულების დამდებმა მხარემ, რომლის-თვისაც შეუძლებელი ხდება ნაკისრი ვალდებულებების შესრულება, დაუყოვნებლივ უნდა გაუგზავნოს მეორე მხარეს წერილობითი შეტყობინება ასეთი გარემოებების და მათი გამოძვევი მიზეზების შესახებ.

თუ შეტყობინების გამგზავნი მხარე არ მიიღებს მეორე მხარისაგან წერილობით პასუხს, იგი თავისი შეხედულებისამებრ, მიზანშეწონილობისა და შესაძლებლობისა და მიხედვით აგრძელებს ხელშეკრულებით ნაკისრი ვალდებულებების შესრულებას და ცდილობს გამოწახოს ვალდებულებების შესრულების ისეთი ალტერნატიული ხერხები, რომლებიც დამოუკიდებელი იქნებიან დაუძლეველი ძალის ზეგავლენისაგან.

14. ქვეკონტრაქტორები

14.1 მიმწოდებელს არ აქვს უფლება გადასცეს ქვეკონტრაქტორს თავისი უფლებები და მოვალეობები, შემსყიდველის წერილობითი თანხმობის გარეშე. შემსყიდველის თანხმობის გარეშე ქვეკონტრაქტორის აყვანის შემთხვევაში, ვრცელდება 10.6. ქვეპუნქტით გათვალისწინებული პირობა.

14.2. ამ ხელშეკრულების ფარგლებში დადებული ყველა ქვეკონტრაქტის ასლი უნდა წარედგინოს შემსყიდველს.

14.3. მიმწოდებლის მიერ ტენდერის ეტაპზე წარმოდგენილი ქვეკონტრაქტორის შეცვლა, ან დამატებითი ქვეკონტრაქტორის აყვანა დაუშვებელია.

14.4. სამუშაოების ნაწილის ქვეკონტრაქტორზე გადაცემით მიმწოდებელი არ თავისუფლდება ხელშეკრულებით ნაკისრი ვალდებულებებიდან.

14.5. მიმწოდებელი უფლებამოსილია ქვეკონტრაქტორს გადასცეს ხელშეკრულებით გათვალისწინებული სამუშაოების ღირებულების არაუმეტეს 40%-ისა.

15. უფლებების გადაცემა

მიმწოდებელმა შემსყიდველის წინასწარი წერილობითი თანხმობის გარეშე, არც მთლიანად და არც ნაწილობრივ არ უნდა გადასცეს მოცემული ხელშეკრულებით ნაკისრი ვალდებულებები მესამე მხარეს.

16. გადასახადები და დაბეგვრა

16.1. უცხოელი მიმწოდებელი პასუხს აგებს საქართველოს კანონმდებლობით ყველა იმ გადასახადის, მოსაკრებლების და სხვა გადასახდელების გადახდაზე, რომლებიც გადასახდელია საქართველოს ფარგლებში და მის გარეთ.

16.2. ადგილობრივი მიმწოდებელი პასუხს აგებს საქართველოს კანონმდებლობით დადგენილი გადასახადების, მოსაკრებლების და სხვა გადასახდელების გადახდაზე, თუ ხელშეკრულებით სხვა რამ არ არის გათვალისწინებული.

17. დავები და მათი გადაწყვეტის წესი

ხელშეკრულების მოქმედების პერიოდში წამოჭრილი ყველა დავა გადაიჭრება ურთიერთშეთანხმების გზით. შეთანხმების მიუღწევლობის შემთხვევაში, დავის გადასაწყვეტად მხარეები უფლებამოსილნი არიან მიმართონ სასამართლოს საქართველოში მოქმედი კანონმდებლობის შესაბამისად.

18. ხელშეკრულების მოქმედების ვადა

ხელშეკრულება ძალაში შედის ხელშეკრულების მხარეთა მიერ კვალიფიციური ელექტრონული ხელმოწერით ან/და კვალიფიციური ელექტრონული შტამპით დამოწმების თარიღიდან და მოქმედებს 2021 წლის 01 დეკემბრის ჩათვლით, ხოლო ხელშეკრულების მე-7 პუნქტით განსაზღვრულ ურთიერთობებზე ხელშეკრულება მოქმედებს გარანტიის ვადით.

19. სხვა პირობები

19.1 ხელშეკრულებაზე შესრულებულია კვალიფიციური ელექტრონული ხელმოწერა ან/და დასმულია კვალიფიციური ელექტრონული შტამპი, კანონმდებლობით დადგენილი წესის შესაბამისად.

19.2 შემსყიდველის მხრიდან ხელშეკრულებაზე ხელმოწერი პირი „სახელმწიფო შესყიდვების შესახებ“ საქართველოს კანონის მე-8 მუხლის შესაბამისად წინამდებარე ხელშეკრულებაზე ხელმოწერით ადასტურებს, რომ მისი მონაწილეობა ხელშეკრულებით გათვალისწინებულ შესყიდვის პროცედურაში არ იწვევს ინტერესთა კონფლიქტს.

20. მხარეთა დასახელება და რეკვიზიტები

„შემსყიდველი“

აჭარის ავტონომიური რესპუბლიკის
სოფლის მეურნეობის სამინისტრო
მის: ქ. ბათუმი, აკ. მ. კომახიძის ქ. N 119
საიდენტიფიკაციო კოდი: 245428265

„მიმწოდებელი“

